

DISSERTATIONIS THEOLOGICÆ
 DE
 TRANSITU RESIPISCENTIUM
 ē
 STATU SERVITUTIS
 IN
 STATUM LIBERTATIS

PARS PRIOR,
 QUAM,

CONS. MAX. VEN. FACULT. THEOL. IN REG. ACAD. ABOENSİ,
 PRÆSIDE

Mag. LAURENTIO O. LEFRÉN,
 S. S. Theol. Prof. Reg. & Ord. nec non Eccl., quæ Christo in Valle
 Gratiae, Reso & Merimasko Colliguntur, Pastore,

Publicæ disquisitioni modeste offert

AND. JOH. MENNANDER,
 Ling. Hebr. Docens.

In Aud. Maj. die XXVII Nov. Anno MDCCXC.
 H. A. M. S.

ABOÆ, Typis Frenckellianis.

שעמו הכן כאמורך ולא תשלט כי איז:

Jef. IX. 3.

כי את על סבלו ואת מטה שכח שכת הנגש בו הרחת
יום טראנסיטאטוס סרוויטיס:

Rom. VIII. 15.

Oυ γαρ ελαβετε πνευμα δελειας παλιν εις Φοβου,
αλλ' ελαβετε πνευμα ισχιεσιας, εν ω ιηραζομεν: Αββα,
• Πατιο.

Galat. V. 1. 13.

Τι ελευθερια θν, ι Χριστοσανη αλευθερωσε, συκετε,
και μη παλιν ζυγω δελειας ενεχεσθε. Τινις γαρ επ' ελευ-
θερια εκλιψιτε, αδελφαι, μονον μη την ελευθεριαν εις α-
φορμην τη σακη, αλλα δια την αγαπην αλλενετε αλλι-
δοιο.

Petr. II. 16.

Ως ελευθεροι, και μη ως επικαλυμμα εχοντες την κα-
κινητην την αισιον, αλλ' ως δελοι Θεοι.



§. I.

Quum vitam intuemur hominum, qui ideo se **vি-**
deri volunt Christianos, quod in prima sua in-
fantia, sacro *Baptismatis lavacro* initiati, membra
Ecclesiæ, quæ a Christo nomen habet, evaserunt,
tantum abest, ut omnes pro talibus adgnoscere possi-
mus, ut potius de plerisque idem prædicare coga-
mur, quod Paulus ad Ephesios scribens de gentibus
pronunciauit, his usus verbis: τὰ λοιπὰ εἴδη περίπατε
εὐ ματαιωτάτη τε νοοῦ αὐτῶν, εσκοτίσμενοι τη διανοία, ου-
τες απιλλοτριώμενοι της ζωῆς τε Θεος, δια την αγνοίαν
την βούην εν αὐτοῖς, δια την πωρωσιν της καρδίας αὐτῶν,
Eph. IV. 18. 19. Hujus tam funesti phænomeni nul-
la neque communior, neque evidentior invenitur caus-
fa, quam quæ in neglectu educationis vere Christianæ
quæritur. Multo enim & latius pateret & lætius
floreret inter nos res Christiana, si & *Parentes* &
Doctores tenerioris ætatis, qua decet sapientia & vi-
gi-

gilantia, quod suum est in fovendis gratiae divinæ operationibus, quarum capaces sunt omnes, etiam terrimi infantuli, qui ad baptisterium Christo oblati & dicati sunt, facere scirent & vellent. Quum vero horum plerique suo se officio non defuisse opinentur, si satis se diligentibus exhibuerunt in iis, quæ ad externam honestatis & civitatis culturam spectare intelligent, vera animi cura prorsus insuper habita, mirum non est, quod omnes Societatis ordines abundare videamus hominibus, qui quid verus & vivus Religionis sensus sit, penitus ignorent, satis se idonea Ecclesiæ membra existimantes, si hæc & sciant & curent, quæ Christianismum quandam mechanicum constituunt, quorum omnia referimus exercitia religionis externæ, quæ sola facultate locomotiva peragi possunt, quorum in numero etiam haberi posse putamus recitationes precum & cantationes hymnorū, quæ sola lingua, infido animo, fieri solent; ut nihil dicam de mortua notitia veritatum salutarium, quæ in multis nihil est aliud, quam memoria verborum & sonorum, quorum mentem nunquam cognoverunt. Optandum esset, ut hoc vitium nonnisi in inficeta observaretur plebecula, sed res, proh dolor! multo se habet aliter. Ejusmodi enim psittacos etiam in ipsis doctorum pulpitis reperi-
re licet, & utinam hi nonnisi paucitate sua essent conspicui! Quamvis enim plerique in doctrinis Theoreticis haud segniter versati reperiantur, non tamen desunt, qui opinione imperitiores inveniantur, quando eis

* 3 *

eis quæstio proponitur de rebus, quæ matura tantum
experiencia cognosci possunt. Hujus adserti neque ve-
rius neque certius invenimus testimonium, quam
quod suppeditant controversiæ doctorum de *Transitu*
Resipiscientium e statu servitutis legalis in statum liberta-
tis evangelicæ, quibus tum exegética tum dogmatica
Theologorum Scripta sunt plena. Hoc igitur argu-
mentum nobis dignum est visum, quod loco specimi-
nis Academici, qua per virium tenuitatem fieri pos-
set diligentia, excutere tentaremus, non quod in quæ-
stione, quæ adulorum quoque Theologorum indu-
striam exercuit, nos aliquid egregii præstare posse
credidimus, sed quod communi jure aperiendi sensa animi
utentes de arduo negotio, fore speravimus, ut facilio-
rem experiremur excusationem, si forte omne pun-
ctum non tulissemus. Quam veniam si nobis dare
non dedignantur Lectores, satis nos operæ pretii se-
cisse existimabimus,

§. II.

Prius vero quam ad argumentum tractandum
propius accedamus, nonnulla generatim monuisse ju-
vabit de diversa *natura statuum*, in quibus vivere sol-
ent, qui nondum eo felicitatis pervenerunt, ut inter
vera & viva Christi membra referri possint, quamvis
Pater cœlestis, pro infinitis gratiæ divitiis, quibus a-
nimus ipsius abundat, nihil unquam neque in regno
naturæ neque in regno *gratiæ* reliqui fecerit, quod

eos ad filium suum unigenitum trahendos pertinuerit,
 Joh. VI. 44. 45. Quum eas ob caussas, quarum §. I.
 mentionem fecimus, nimis saepe usu veniat, ut illa
 vita, qua infantes in *Baptismo* beantur, prius extin-
 guatur quam ad annos discretionis perveniant, ne-
 cesse est, ut magnus existat numerus mortuorum Eccle-
 siæ membrorum. Ea loquimur infelicia Christianorum si-
 mulacra, quibus verus & vivus Religionis sensus defi-
 cit, quique ideo vitam hominibus indignam vivunt,
 non ea facientes, quæ fana ratio & divina revelatio,
 ut bona rectaque commendant, sed quæ improbae do-
 minæ libidines ut jucunda imperant. Accedit aliud
 malum, quod multitudinem infelicium hominum ad-
 huc majorem reddit. Nam opinione saepius usu ve-
 nire solet, ut qui vera & bona usi sunt educatione, &
 a teneris inde ungivulis sapienti etjam institutione
 gavisi fuerunt, & proinde vero ac vivo religionis sen-
 fu imbutum habuerunt animum, partim illecebris pra-
 vae naturæ decepti, partim mali mundi blanditiis abrepti
 desicere, & alia post alia prævaricationum specimina
 dare incipient. Hi initio, renuente ratione & recla-
 mante revelatione, peccant, non sine moribus conscientiæ,
 qua adhuc utuntur tenera. Ex quo vero rario-
 ra peccata crebrioribus & leviora delicta gravioribus
 continuo auxerunt, accidit tandem illa calamitas, ut
 hi etjam callo obductam nanciscantur conscientiam, quæ
 cupiditatibus sensualibus, secura dolorum & terrorum,
 obtemperat, ex iisque nescio quem jucunditatis sen-
 sum

sum percipit. Hi homines ideo in statu *securitatis* vi-
vere dicuntur, quod securi sint omnium, adeo ut fur-
dis fabulam narres, sive cœli, sive inferni mentionem
facias, sive illius dulcissima *gaudia*, sive hujus gravis-
sima *supplicia* tanquam caussas resipiscendi adducas.
Ad statum igitur *securitatis* non una venitur via. A-
lli, ut modo diximus, perversæ *educationis* & incon-
sultæ *institutionis* vitio *indolentiam*, αναλγησιαν, alii
neglecta *conscientiae custodia*, qua adversus internos &
externos peccati impetus vigilare debuerant, *dedo-
lentiam*, απαλγησιαν, *conscientiae contraxerunt*. Utri
melius, utri pejus habeant, disquirere nihil adtinet;
in universum vero *tria* sunt *genera securorum homi-
num*, quæ nunc seorsim paucis descripsisse non pige-
bit, quamvis in eo convenienter singula, quod ex ho-
minibus constent, qui Paulo απιλλοτριωμενοι της ζωης
τε Θεος, ab alienati a vita Dei, h. e. eo destituti piorum
sensuum & bonorum motuum principio, quod a *Spiritu*
Dei inhabitante & vivificante proficisciatur, & a quo
& voluntas & facultas bona faciendi & mala fugiendi
resultat, quod Paulus vocat αρνησασθαι την ασεβειαν
και τας ποσικας επιθυμιας, & σωφρονως, δικαιωσικα ευ-
σεβως ζην εν τω νυν οιων ι. τ. λ. Tit. II. II.

Tria vero illa securorum genera, quorum nuper
mentionem injecimus, ita denominare audemus, ut

primum *impudicum*, alterum *honestum*, tertium *religiosum*
 adpellemus. Sunt enim, qui impium suum animum
 nulla plane *larva*, neque ab *honestate*, neque a *pietate*
 desumpta, tegere satagunt, sed omnino quales sunt,
 tales adparere volunt, illam solam adhibentes cautio-
 nem; ut *graviora scelera*, a quibus metu gladii Magi-
 stratus retrahuntur, in *occulto* patrent, susque deque
 habentes obstacula, quae illis opponit *conscientia*; ad
 ejus monita, siue a *ratione*, siue a *revelatione* pro-
 fiscantur, tanto facilius obsurdescunt, quanto solertius
 exegitare didicerunt argutias, quibus utraque ad si-
 lentium redigere conantur. Alterum *genus* est, quod
honestum diximus, non quod honestatem actionum ma-
 gni faciant, sed quod id sollicite agant, ut honesti vi-
 deantur, qui ad illud pertinent, quantumvis honestati
 aduersum teneant, quae tacitis volvunt cogitationibus,
 nihil tam impium existimantes, quod non dicerent
 aut facerent, nisi famæ serviendum putarent, plus e-
 molumenti ex fucata quam ex nativa vitae elegantiâ
 eaptantes. Hos quominus cum tertio genere con-
 fundas, multæ & variæ prohibent rationes, & haec no-
 minatim, quod studio honesti, quod sequuntur, non re-
 pugnare putant apertum *religionis contemtum*. Quare
 ipsi quoque *Athei* in hac impiorum classe locari pos-
 sunt, si modo eo cæcitatis non progrediantur, ut re-
 bus suis *honesto* se, quam *scelesto* vitae genere rectius
 consulere nègent. Interea quam parum pretii almæ
virtutum matri, pietati, statuere soleant omnes, qui ad
hoc

hoc genus referri merentur, sive *crassius*, sive *subtilius* impietatis genus sub vana *honestatis larva* tegant, vel inde adparet, quod nihil illis tam dispiceat, quam quod *religionem redoleat*, id quod haud obscure indicant partim *saturnæ mimicæ*, partim aculeata *opprobria*, quibus illis solenne est lacescere quidquid religiosum observaverint, sive id in personis, sive in verbis, sive in factis adpareat. Atque hoc ipso satis aperte produnt, quantopere dissideant ab illo *securorum genere* quod a *religione* denominationem sumere jussimus, non quod vero & vivo *religionis sensu* adisciuntur, sed quod *falsam religionis larvam* interiori dedecori praetextare proficuum putant, sive id *habendi*, sive *eminendi*, sive *fruendi*, sive alia quaecunque libido suaserit. In hac securorum classe non tantum *laicos*, sed etiam *clericos* offendere licet. Utrique enim ita caelulos subducere solent, ut satius putent *fictam pietatis larvam* induere, quam animum pietate vacuum dictis & factis publice praeserre. Hæc tria genera, quamvis in plurimis differant, in *duabus tamen rebus* conveniunt, quod *Deum non reverentur*, & quod *alii alios odio habent*.

¶ IV.

Hi omnes, tam qui *hypocritas agunt*, *speciem honestatis & pietatis* mentientes, quam qui *omniorum rubore at pudore vacui manifeste in honestum & impium transfigutus*

sigunt vitam, omnia quæ cogitant, dicunt & faciunt, eo potissimum conferendo, ut æterna sibi supplicia adtrahant, tria omnino prædicata in *Sacris Litteris* sustinere solent; nunc enim mortui, nunc servi, nunc stulti dicuntur. *Mortui* quidem, quod cauteriata utuntur *conscientia*, nullum neque dolorem neque *terrem* ex admissis peccatis sentientes, *απιλυγητες* Eph. IV. 19., *νεροι τοις παραπτωμασι*, Cap. II. 15. *Servi* vero, quod omni tum *libertate* tum *facultate* peccatis renunciandi destituti, nihil nisi miserrima diaboli mancipia sunt, quæ ejus laqueis irretita *ejus voluntatem* facere coguntur, 2. Tim. II. 28. Joh. VIII. 44. 1. Joh. III. 8. 10. Ebr. II. 14. *Stulti* autem, quod nihil tam alienum esse potest a vera sapientia, quam se *imperio Regis* omnium *sapientissimi*, *benignissimi*, *potentissimi* subducere, & ad *castra* confugere *hostis* omnium *indignissimi*, *crudelissimi* & *immanissimi*, a quo nihil nisi *æternum exitium*, tanquam *servitutis mercedem*, sibi polliceri possunt. His cum, divina favente *gratia*, accidit, ut *audito verbo veritatis*, 2 Cor. VI. 1, *verbo Evangelii*, A&t. XV. 7, *verbo Domini*, Cap. XIII. 48, *verbo gratiæ*, Cap. XIV. 3, *verbo salutis*, Cap. XIII. 26, quod *δυναμις Θεος εσιν εις σωτηριαν παντι τω πισευοντι*, Rom. I. 16, paullatim expurgiscere incipient, tum gemino se beneficio bearci sentiunt. Primum enim, dissipatis tenebris *ignorantiae*, quæ eos antea, quominus verum videre possent, impediverant, verum animi statum animadvertisunt; deinde, cum sibi ob innumera peccata
æter-

æternum exitium imminere intelligunt, recedit illa
ἀπαλυγοια της καρδιας, *indolentia cordis*, qua diu op-
 pressi jacuerunt, in ejusque locum acutus succedit
sensus doloris ac terroris, qui ex consideratione bar-
 athri infelicitatis, in quod se servitio peccatorum præ-
 cipitos vident, naturaliter oritur. Ubi hoc exper-
 ti sunt, non amplius *securi*, sed *excitati* salutantur, in-
 primis si hic status perseveret, & dolores consciencie
 acutiores evadant, quam quos subinde, in statu
 securitatis senserunt, cum ne ipsa quidem *ratio* gra-
 viora eorum *scelera* sine severis *monitis* dimittere po-
 tuerit. Nihil vero exoptabilius foret, quam ut o-
 mnes, agnita paccatorum miseria, *extempore* & a
 primis inde initii *μετανοιας* alteri monito obtempera-
 rent Baptista: *πισευετε εν τω ευαγγελιῳ*, Marc. I. 15, nec
 fidem habere detrectarent ipsis Salvatori, qui *viam Sa-*
lutis uno verbo *μετανοοιτε* expressit, statim subjiciens:
ηγγικε γαρ η βασιλεια των ερων Math. IV. 17. Sed
 quemadmodum securis nihil tam difficile, quam *με-*
τανοειν, seu inveterata deponere præjudicia & veram
 ac sanam mentis atque *cordis* mutationem necessariam
 adgnoscere, si salvi fieri velint; ita excitatis nihil dif-
 ficilius esse solet, quam *πισευειν*, *credere*. Hæc enim
 est illa *εννη πυλη*, *και τετλιμμενος οδος η απαγγελα εις*
την ζωην, de qua Christus dicit: *και ολιγοι εισιν οι ευρι-*
σκούτες αυτην, Math. VII. 14. Quam hic *viam* intelli-
 git Salvator, ex verbis patet, quæ sequuntur: *προσε-*
χετε δε απο των ψευδοπροφητων, v. 15, quo nomine

Phariseos intelligit, quorum doctrinam suæ doctrinæ e diametro oppositam esse significat. Christus enim, ejusque Apostoli viam & portam, qua ad salutem eundum & veniendum, in sola vera & viva ponebant fidē, adeo ut tota doctrina Salvatoris nomine πιστεως saepissime veniat, ut eo efficacius opponatur εργοις, in quibus salutem ponebant Judæi, (quorum religio in primis occupata erat circa tot ritus & opera manuum, quibus cultrum tractabant, quo enecabantur, excorabantur & disseceabantur animalia sacrificiis destinata), non scientes neandum credentes sub his umbris olim occultatum fuisse mysterium crucis Christi, quod sola fides invenire, inventum eruere, erutum adprehendere & adprehensum in Salutem convertere potest. Tantum abest, ut illa via quam eligunt, qui per opera ad salutem grassandum putant, τεθλημενος, arcta, dici possit, ut potius quam via fidei multo videatur latior & amplior. Certe cum pauci viam fidei inveniant, multi viam operum ingrediuntur. Qui fide salvari volunt, ii priusquam ingredi possint, necesse habent omnia sua merita deponere & vera ac viva cognitione suam tenuis & graciles fieri, ut similes sint filis, quæ per foramen acus intrare possunt. Neque enim quisquam sibi prius persuadere patitur, ut solo merito Christi fidat, quam nihil in se invenerit, quo niti possit. Quare etiam Salvator primum passum beatitudinis designaturus, μακαριος, inquit, οι πτωχοι τω πνευματι, οτι αυτων εσι η βασιλεια των εργων, Math. V. 3. Hic ius

*) (xi) *

jus hæreditatem cœlestem adeundi tribuitur *pauperibus*. Interest inter *pauperes* & *divites* tertium genus hominum, quod eorum est, quibus quamvis nihil supersit, nihil tamen deficiat. *Pauperes* vero proprie sunt, quibus *omnia* etiam necessaria *defunt*, nec *vires* adquirendi habentibus. Tales πτωχοι τω πνευματι sunt, qui vero conscientiae judicio fateri coguntur, non tantum nihil sibi rerum spiritualium suppeteret, nihil *justitiae*, nihil *pacis*, nihil *gaudii* in *Spiritu Sancto*, Rom. XIV. 17, sed tanta quoque *inopia virium* adquirendi laborare, ut unde habeant aut accipiant, prorsus ne- sciant, nisi sit, qui pura puta ductus *misericordia largiatur*. Qui hanc *inopiam* non amplius æquo animo intueri possunt, sed eam πενθευτες, lugentes, deplorant, & insuper non ritum imitantur canum, qui lapidem, quo feriuntur, mordicus persequuntur, sed sunt προσεις, mites, πεινωντες και διψωντες την διαισθησιν, esurientes & sitientes *justitiam*, iis omnia sunt parata, & mox impertranda sine ulla alia conditione quam quæ a Salvatore his verbis proponitur: αἰτεῖτε, ζητεῖτε, κρεπετε, rogate, quærite, pulsate, Math. VII. 7, legatur totus locus. Eo autem citius experientur veritatem trium sequentium verborum: δοῦλοι εστει υμιν, ευρισκετε, ανοιγοτεται υμιν, quod Salvatori O. M. nec voluntas nec facultas conferendi deest, quippe qui, ut testatur Paulus: δι υμας επτωχευσε πλεσιος ον, ινα ιημεις τι εκεινε πτωχειο πλεσιοτε, 2. Cor. VIII. 9.

§. V.

Neutquam vero omnes, qui *beneficium excitatio-*
nis acceperunt, ita e statu *servitutis*, in quo *servitutem*
peccati & diaboli servierunt, statim in statum *libertatis*
transire solent, sed potius plerique, partim cæcæ *ra-*
tionis suasu decepti, partim perversæ *institutionis* vi
seducti, similes inveniuntur Israëlitis, qui, cum ad fi-
nies terræ promissæ adducti essent, vel *sua animi ti-*
miditatæ abrepti, vel *aliena (speculatorum) stoliditate*
impulsi in desertum resiliuerunt, eamque quoad Mo-
fes vixit non intrarunt. Sine ambagibus quod res est
dicam. Plerorumque eatum *ignorantia*, tum *diffiden-*
tia est, ut simul ac e *fanno securitatis* evigilarunt, sta-
tim ad thronum gratiæ accedere nolint, quo fit, ut in
novum incident statum servitutis, quam a lege *legalem*
dicere solemus, quod *jugo legis colla submittere sa-*
tius ducunt, quam *nulla emendatione prævia* ad Chri-
stum confugere, sine quo tamen eo minus aliquid ve-
re boni facere possunt, quo verius est effatum Salva-
toris: χωρὶς εὐς οὐ δυνατὸς ποιεῖν θέλει, Joh. XV. 5. Sen-
sus vi contextus hic est: quemadmodum fieri non potest,
ut palmes fructum ferat, nisi viti insertus fuerit, in ea-
que maneat; ita nemo homo prius bona opera facere po-
test, quam Christo viti vera & viva fide infitus fuerit.
Duo sunt, quæ hominem recens excitatum illico ati-
gere, turere & coquere solent, alterum quod *peccatis*
antea commissis magnam se culpam contraxisse intelli-
git,

git, alterum, quod *longa peccandi consuetudine* sic attixit *institum naturae vitium*, ut *inveteratus prævaricandi habitus* in alteram degeneraverit naturam, quam, ut habet proverbium, si vel *furca expellas*, tamen usque *recurreret*. Interim tamen miserum hominem *excitatum* eo stultitiae propellit illa ipsa, cuius nuper mentio facta est, *rationis cœcitas & institutionis perversitas*, ut istam *furca legis* expelli posse credat. Atque ita aperitur misera illa scena, quam Paulus, variis usus prosopopœiis Rom. VII, graphice describit. Recte hic quæri potest, *utrum prius sit*, de *abolitione peccatorum ante commissorum*, an de *impeditione delictorum post futurorum cogitare*? Si verum & purum Dei verbum consulere velimus, certo certius intelligemus, *utrumque eadem opera a Sospitatore O. M. præstari*. Nam Pater noster qui in cœlis est, pretiosissimo *Fili sui Unigeniti Sanguine*, quem pro nobis effudit, nobis non tantum acquirendum curavit ditissimum thesaurum, quo omne nostrum æs alienum perfecte solvi, sed verissimam quoque medicinam, qua corrupta nostra natura penitus sanari potest, modo ea rite uti velimus. In eo sunt omnia. Is enim eyendu nūn oōθια atto Θεος, δικαιουντες και αγιαστεος και απολυτων, 1. Cor. I. 30. Qui Eum vera & viva recipit fide, is omnia haec munera possidet indivisa, adeo ut ei non tantum remissa sint peccata, sed etiam dominium eorum ab olitum; illud enim dicit δικαιουντες, hoc vero απολυτων, quæ vox apud auctores tam profanos quam

Sacros redemtionem & liberationem captivorum significat. Hinc gratia Dei vocatur σωτηρίος, salutaris, eo quod nos docet να αρνησαμενοι την ασεβείαν και τας πονημάς επιθυμίας, σωφρονώς και δικαίως και ευσεβώς ζησωμενεν τωνν αιωνι. Tit. II. II. Quid vero de hac quæstione doceat minus sana & fida excitatorum ratio, id ex ipsa eorum *praxi*, unde tota *Servitus Legalis* existit, optime dispalescit,

§. VI.

Audiamus igitur quomodo calculos subducere soleant, qui, sub *duro peccati jugo* sudantes, *rationis consilium & auxilium*, *Scriptura non consulta*, implorant. Morbo, inquiunt, laboramus inveterato eoque gravissimo; ergo *nos ipsi curabimus*. Hoc perinde est, ac si dicarent, pecora nostra morbo laborant, ergo ipsa se pecora nostra curabunt. In utroque enim enunciato subintelligi debet conditio: *si fieri potest*, quæ in utroque pari ratione neganda. Nec multo sapientius ratiocinantur, qui *Mosis ejusque Legi* curam frangendi dominii peccatorum committendam sciscunt, quod si ne stultitia minime fieri potest. Non equidem inficior, in *Lege Mosis latere aliquid*, quod olim aliquo modo ad sanandum pertinuit, quandoquidem *Moses de Christo scripsit*, Joh. I. 46, V. 46; sed præterquam quod, quæ in lege inveniri potest *medicina* non patet sed *latet*, certum etjam est, eam ibi non in *natura* sed in

* * 15 *

in pietura inveniri. Quæ in Lege Mosis occurunt præcepta moralia, ea ad hoc profunt, ut vivi & sani, qui ambulare possunt, viam sciant, qua eundum, ipsam vero eundi facultatem a descriptione itineris repeteret absurdum est. Sed redeamus ad Paulum, & quantum ille virtutis Legi ad recte & beatæ vivendum tribuat, videamus. *Vim indicandi*, quid rectum aut pravum, bonum aut malum sit, Legi diserte adserit, eoque intuitu eam & bonam & sanctam pronunciat, sed simul ac questionem de vi removendi peccatum & abolendi ejus dominium instituit, ei plane contrarium tribuit effectum. Lex, inquit, mortuum peccatum excitat & vivificat, & quietum atque placidum irritat magisque exasperat, adeo ut turba libidinum adpetitumque sensualium, quæ, nulla Lege adhuc audita, quodammodo filere videbatur, auditis præceptis prorsus furere incipiat, haud aliter ac rabidus molossus baculum persecutientis primum mordere & mox in ipsa ejus membra sævire solet. Quid! quod Paulus eo tandem valere dicat institutum excitatorum, quo furorem cupiditatum carnalium lege mitigare conantur, ut se venundata peccati mancipia fateri cogantur omnes, & exclament necesse est; *quis me liberabit ab hoc corpore quod peccatum sibi proprium reddidit mancipium?* Hæc cupiditatum violentia, quamvis in aliis major in aliis minor observari possit, prout cuique alia atque alia ingenii, animi, temperamenti, refumique externalium contigerit conditio, ex qua dissimilis *sensitio*.

tiendi, judicandi, agendique ratio pendere solet; jure tamen dubito, an quisquam sibi persuaderi patiatur ad Christum liberatorem configurare, priusquam suo modo tam acutum miseriæ sensum expertus fuerit, ut saepius necesse habuerit citatam modo querelam Paulinam; τις με ευτεται? acerbis lacrymis ingeminare. Interea alios citius, alios tardius, alios facilius, alios difficilius ex hoc luto eluctari, certum est. Et quamvis unicuique tardioris liberationis caussæ in suo ipsius finu quærendæ sint, negari tamen non potest, quomodo moderatio divinæ providentiae hic vere inveniat locum.

Heic certe adiplicari posse credimus tritum illud: ubi multum crucis, ibi multum lucis,

§. VII.

Venimus nunc ad id, quod totius hujus disputationis caput est, illam loquimur nobilissimam Theologisque vexatissimam quæstionem, quæ moveri solet de Limitibus, quibus Status Servitutis a Statu Libertatis distinguitur. Quæsitum nimirum est, utrum adeo confusi sint termini, ut alter alterum ingrediantur & certo sciri nequeat, in utro vivatur. Non defunt, qui hoc ideo adsfirmandum putant, ut eo facilius tueri possint interesse aliquod carnale, quod sibi ex hoc VII Cap. Epist. Pauli ad Romanos exculpere satagunt, prava decepti Philautia, qua unusquisque hominum carnalium eo stultiæ progredi solet, ut se re-

ge-